

萬有文庫

第二集七百種

王雲五主編

唐詩紀事

(四)

計有功撰

商務印書館發行

唐詩紀事

(四)  
撰者謝

國學基本叢書

# 唐詩紀事卷第四十五

朱灣

王良會

柳公綽

張正一

徐放

崔備

蘇郁

胡幽貞

張儼

杜頤

韋丹

鄭俞

杜元穎

吳丹

鄭餘慶

趙宗儒

周弘亮

王播

周匡物

許玫

張碧

朱灣

題段上入院壁畫古松詩云石上盤古根謂言天生朽一作安知草木性變在畫師手陰深方丈閒真一作

直趣幽且閒木文離披勢搓粹中裂空心火燒出掃成三寸五寸枝便作千年萬年物莓苔濃淡意不同

一半死皮藏蠹蟲風霜未必來到此氣色杳似寒山中孤標可翫不可取能使支公道場古

平陵寓居再逢寒食節云幾迴江上泣途窮每遇良晨歎轉蓬火燧知從新節變灰心還與故人同莫聽

黃鳥啼愁處自有花開向客中貧病故應無撓事但將懷抱醉春風

逼寒節寄崔七云閒庭只是長莓苔三徑曾無車馬來旅館尙愁寒食火羈心懶向不然灰門前下客雖

彈鋏溪畔窮魚且曝腮他日趨庭應問禮須言陋巷有顏回

九日登青山云昔人惆悵地繫馬又登臨舊處煙霞在多時草木深水將空合色雲共我無心想見龍山

會良辰亦似今。

灣別湖州崔使君侃書云。灣聞蓬萊之山。藏杳冥而可到。驪龍之珠。潛濱滉而可識。貴人之顏。無因而前。不可識。灣自假道路。聞津主人。一身孤雲。兩度圓月。凡再請職事。三趨戟門。門人謂灣曰。子私來耶。公來耶。若言公。僕實非公。若言私。公庭無私。以茲交戰。彷徨于今。信知庭之與堂。不啻千里。況寄食漂母。夜眠漁舟。門如龍而難登。食如玉而難得。如龍之門。轉深如玉之粟。轉貴實無機心。翻成機事。漢陰丈人。聞之豈不大笑。屬谿上風便。囊中金貧。望甘棠而歎。自引分而還也。

灣爲李勉永平從事。灣秋夜宴王郎中宅。賦得露中菊云。衆芳春競發。寒菊露徧滋。受氣何曾異。花開獨自遲。晚成猶有分。欲採未過時。忍棄東籬下。看隨秋草衰。

賦得白鶴翔翠微。送陳偃下第云。不知鷗與鶴。天畔弄晴暉。背日分明見。臨川相映微。淨中雲一點。迴處雪孤飛。正好南枝住。翩翩何所依。

長安喜雪云。千門萬戶雪花浮。點點無聲落瓦溝。全似玉塵消更積。半成冰片結還流。光含曉色清天苑。輕逐微風遶御樓。平地已霑盈尺潤。年豐須荷富人侯。右三詩草莊取爲又玄集

高仲武云。朱灣率履貞素。放情江湖。郡國交辟。潛耀不起。有唐高人也。詩體幽遠。興用洪深。因詞寫意。窮理盡性。於詠物尤工。如受氣何曾異。開花獨自遲。所謂哀而不傷。國風之深者也。

王良會

武元衡鎮西蜀。有中秋夜錦樓望月詩云。玉輪初滿空。迴出錦城東。相向秦樓鏡。分飛碣石鴻。桂香隨窈

宛珠綴隔玲瓏。不及前秋見。團圓鳳沼中。  
良會和云。德星搖此夜。珥月滿重城。杳靄煙氛色。飄飄砧杵聲。令行秋氣爽。樂感素風輕。共賞千年聖。長歌四海清。  
良會以內侍省爲監軍使。

柳公綽

和錦樓翫月詩云。此夜年年月。偏宜此地逢。近看江水淺。遙辨雪山重。萬井金花肅。千林玉露濃。不惟樓上思。飛蓋亦陪從。

公綽裴度同爲西蜀武元衡判官。綽先入爲吏部郎中。度有詩曰。兩人同日事西征。今日君先捧紫泥。公綽字寬。京兆人。時爲西川營田副使。兼少尹。後終於刑部尙書。取士如許康佐。崔與。李拭。章長。皆知名。貴顯云。

張正一

和錦樓翫月詩云。高秋今夜月。皓色正蒼蒼。遠水澄如練。孤鴻迴帶霜。旅人方積思。繁宿稍沈光。朱檻叨陪賞。尤宜清漏長。正一時爲西川觀察判官。

正一德宗末年爲左補闕。以上書召見。王叔文之黨疑正一言已陰事。令韋執誼反譖於上。乃與所善王仲舒。劉伯芻。皆坐遠貶。

徐放

和錦樓翫月詩云。玉露中秋夜。金波碧落開。鵲驚初泛濫。鴻思共徘徊。遠月清光徧。高空爽氣來。此時陪  
永望。更得上燕臺。

放字達夫。元衡西川從事。元和九年爲衢州刺史。見退之徐偃王廟碑。

崔備

和錦樓翫月詩云。清景同千里。寒光盡一年。竟天多雁過。通夕少人眠。照別江樓上。添愁野帳前。隋侯恩  
未報。猶有夜珠圓。又云。四時皆有月。一夜獨當秋。照耀初含露。徘徊正滿樓。遙連雪山靜。迴入錦江流。願  
以清光末。年年許從遊。備時爲西川度支判官。

備使院憶山中道侶兼懷李約云。松竹去名岳。衡茅思舊居。山君水上印。天女月中書。舊帙芸香在。空奩  
藥氣餘。褐衣寬易攬。白髮少難梳。病柳傷摧折。殘花惜掃除。憶巢同倦鳥。避網甚跳魚。阮巷慙交絕。商巖  
愧跡疏。與君非宦侶。何日共樵漁。

清溪路中寄諸公詩云。偏郡隔雲岑。迴溪路更深。少留攀桂樹。長渴望梅林。野筍資公膳。山花慰客心。別  
來無信息。可謂井瓶沈。

元衡中秋夜聽歌聯句。此夕來奔月。何時去上天。備雲鬢方自照。玉腕更呈鮮。度燕婉人閒意。飄飄物外  
緣。公綽上詩裁明月扇。歌索想夫憐。元衡奉暗染荀香久。長隨楚夢偏。放會當乘采鳳。髣髴逐神仙。士

元衡在蜀。淡於接物。而開府極一時。選公綽爲少尹。張正一觀察判官。備度支判官。裴度掌書記。盧士政  
觀察推官。楊嗣復節度推官。

蘇郁

鸚武詞云。莫把金籠閉鸚武。箇箇分明解人語。忽然更向君前語。三十六宮愁幾許。和戎詩云。關月夜懸青冢鏡。寒雲秋薄漢宮羅。君王莫信和親策。生得胡雛轉更多。郁貞元元和閒詩人。十二樓藏玉牒中。鳳皇雙宿碧芙蓉。流霞淺酌誰同醉。今夜笙歌第幾重。步虛詞

胡幽貞

題西施浣紗石云。一朝入紫宮。萬古遺芳塵。至今溪邊花。不敢嬌青春。歸四明詩云。海色連四明。仙舟去容易。天籍豈輒問。不是卑朝士。張爲取二詩作主客圖。

張儼

貞元八年十二月。謁先主廟絕句三首云。仗順繼皇業。并吞勢由己。天命屈雄圖。誰歌大風起。其得股肱賢明。能以奇用兵。何事傷客情。何人歸帝京。其二。雄名垂竹帛。荒陵壓阡陌。終古更何聞。悲風入松柏。其三。

杜顒

故絳行云。君不見銅鞮觀。數里城池已蕪漫。君不見祈禱宮。幾重臺榭亦微蒙。介馬兵車全盛時。歌童舞女妖豔姿。一代繁華皆共絕。九原惟望冢壘壘。

韋丹

江西韋大夫丹。與東林靈澈上人爲忘形之契。丹常爲思歸絕句。以寄澈公云。王事紛紛無暇日。浮生冉

冉只如雲。已爲平子歸休計。五老巖前必共聞。澈奉酬詩云。年老身閒無外事。麻衣草坐亦容身。相逢盡道休官去。林下何曾見一人。

丹字公明。京兆人。幼孤。從外祖顏真卿。元和中守江西。功第一。

鄭俞

玉水記方流詩云。積水蒸風動。因知玉德幽。如天涵素色。侔地引芳流。潛潤滋雲起。熒華射浪浮。魚龍泉不夜。草木岸無秋。壁沼甯堪比。瑤池詎可儔。若非懸坐側。猶得冀冥搜。

俞登貞元十六年進士第。杜元穎。吳丹。白樂天皆同年登科。樂天爲河南尹。俞始授長水縣令。樂天四雖吟云。命雖薄。猶勝於鄭長水。

杜元穎

玉水記方流詩云。重泉生美玉。積水異常流。始玩清堪賞。因知寶可求。斗回清氣見。磬折紫花浮。中矩皆明德。同方叶至柔。月華偏共映。風韻喚將遊。遇鑒終無暗。逢時願見收。

元穎。淹之孫也。貞元末登第。敏文辭。憲宗特所賞歎。穆宗立。拜中書舍人。不閱歲。至宰相。再期鎮蜀。敬宗驕僻。元穎哀斂。上供削軍食。遂啓南詔之寇。斥爲循州司馬。死貶所。在蜀時。官屬崔瑣。訖于衆盧。并奪秩分逐之。

吳丹

玉水記方流詩云。玉流何處記。四折水紋浮。潤下不逾矩。居方在上流。映空虛漾漾。搖日靜悠悠。影碎疑



衝斗光流耐觸舟。珪璋分辨壯。砂礫共懷愁。願獻朝賓海。縈迴入御溝。

樂天花前歎云。前歲花前五十二。今歲花前五十五。歲課年功頭髮知。從霜成雪君堪取。幾人得老莫自嫌。樊李吳韋盡成土。註云。樊絳州宗師。李諫議景儉。吳饒州丹。韋侍郎穎。皆舊往還。相次喪逝。南州桃李北州梅。且喜年年作花主。花前置酒誰相勸。客坐唱歌滿起舞。欲散重拈花細看。爭知明日無風雨。丹字真存。登第。歷職至鎮州宣慰副使。甌使尙書郎。卒於饒州。葬於恆州。樂天爲誌。

### 鄭餘慶

和黃門相公過石門洞云。紫氛隨馬處。黃閣駐車情。嵌壑驚山勢。洲灘戀水深。地分三蜀險。關志百牢名。琬琰攀酬郢。微言鼎飪情。黃門武元衡也。

餘慶字居業。滎陽人。善屬文。嚴震帥山南西道。奏置幕府。貞元末。爲相。憲宗立。再相。出鎮山南西道。穆宗立。加檢校司徒。卒。

### 趙宗儒

宗儒字秉文。鄧州人。父驊。有文名。宗儒爲翰林學士。驊改祕書少監。父子並命。驊少與殷寅。顏真卿。柳芳。陸據。蕭穎士。李驊。邵軫。善。時語曰。殷顏柳陸。李蕭邵趙。皆謂全交也。宗儒貞元十二年爲相。以文學歷將相位。任崇劇。然無儀矩。以治生鎖碎失名。

和黃門相公詔還題石門洞云。益部恩輝降。同榮漢相還。韶芳滿歸路。軒騎出重關。望日朝天闕。披雲過蜀山。更題風雅韻。永絕翠巖閒。

周弘亮

除夜書情詩云。何處風塵歲。雲陽古驛前。三冬不再稔。曉日又明年。春入江南柳。寒歸塞北天。還傷知候客。花景對韋編。

故鄉除夜詩云。三百六十日云終。故鄉還與異鄉同。非唯律變情堪恨。抑亦才疏命未通。何處夜歌銷臘酒。誰家高燭候春風。詩成始欲吟將看。早是去年牽課中。

弘亮登貞元進士第。

王播

王播少孤貧。嘗客揚州惠照寺。木蘭院。隨僧齋餐。僧厭怠。齋罷而後擊鐘。後二紀。播自重位。出鎮是邦。因訪舊遊。向之題名。皆以碧紗幕其詩。播繼以二絕曰。三十年前此院遊。木蘭花發院新修。如今再到經行處。樹老無花僧白頭。上堂已了各西東。慙愧闍黎飯後鐘。三十年來塵撲面。而今始得碧紗籠。出樵言播字明敷。父恕。家揚州。播貞元中。與弟炎起。皆有名。穆宗立爲相。居位無所裨益。復失河北衆望。不厭。乃出爲淮南節度。太和初。復輔政。時韋處厚以獻替自任。而播專以錢穀進。不甚與事。居位四年卒。

爲淮南節度使。游故居感舊詩云。昔年獻賦去江湄。今日行春到卻悲。三逕僅存新竹樹。四隣唯見舊孫兒。壁閒潛認偷光處。川上寧忘結網時。更見橋邊記名姓。始知題柱免人嗤。

李德裕和云。千騎風生大旆舒。春江重訪武侯廬。共提龜印銜新綬。同憶鱣庭是故居。取履橋邊啼鳥換。釣橫溪畔野花疏。今來卻笑臨邛客。入蜀空馳使者車。

周匡物

匡物字幾本潭州人。元和十一年李逢吉下進士及第。時以歌詩著名。家貧。徒步應舉。至錢塘。乏僦船之資。久不得濟。乃題詩公館云。萬里茫茫天塹遙。秦皇底事不安橋。錢塘江口無錢過。又阻西陵兩信潮。郡牧見之。乃罪津吏。及第後謝座主云。一從東越入西秦。十度聞鶯不見春。試向崑山投瓦礫。便容靈沼洗埃塵。悲歡暗負風雲力。感激潛生土木身。中夜自將形影語。古來吞炭是何人。

許孜

題鴈塔云。寶輪金地壓人寰。獨上蒼冥啓玉關。北嶺風煙開魏闕。南軒氣象鎖商山。灞陵車馬垂楊裏。京國城池落照閒。暫放塵心遊物外。六街鐘鼓又催還。

攻太和元年登第。其兄弟瑄。瓘。皆高科。

張碧

秋日登岳陽樓晴望云。三秋倚練飛金盞。洞庭波定平如剗。天高雲捲綠羅低。一點君山礙人眼。漫漫萬頃鋪琉璃。煙波闊遠無鳥飛。西南東北競無際。直疑侵斷青天涯。屈原回日牽愁吟。龍宮感激致應沈。賈生憔悴說不得。茫茫煙靄堆湖心。又云。范蠡帆張一掌風。無人來往繼其中。

鴻溝云。毒龍銜日天地昏。八紘鬣鬣生愁雲。秦原走鹿無藏處。紛紛爭處蜂成羣。四溟波立鯨相吞。蕩搖五岳崩山根。魚鰕舞浪狂鯁鯁。龍蛇膽戰登鴻門。星旗羽鏃強者尊。黑風白雨東西屯。山河欲坼人煙分。壯士鼓勇君王存。項莊憤氣吐不得。亞父卧聲上天聞。玉光墮地驚崑崙。留候氣魄吞太華。舌頭一寸生

陽春神農女媧愁不言。蛇枯老媪啼淚痕。星曹定秤秤王孫。項籍骨輕迷精魂。沛公仰面爭乾坤。須臾垓下賊星起。歌聲繚繞悽人耳。吳娃捧酒橫秋波。霜天月照空城壘。力拔山兮忽到此。騅嘶懶渡烏江水。新豐瑞色生樓臺。西楚寒蒿哭愁鬼。三尺霜鳴金匣裏。神光一掉八千里。漢皇驟馬意氣生。西南掃地迎天子。

美人梳頭云。玉堂花院小枝紅。綠窗一片春光曉。玉容驚覺濃睡醒。圓蟾挂出妝臺表。金盤解下叢鬢碎。三尺巫雲縮朝翠。皓指高低寸黛愁。水精梳滑參差墜。須臾攏掠蟬鬢生。玉釵冷透冬冰明。芙蓉拆向新開臉。秋泉慢轉眸波橫。鸚武偷來話心曲。屏風半倚遙山綠。

題祖山人池上怪石云。寒姿數片奇突兀。曾作秋江秋水骨。先生應是厭風雲。著向江邊塞龍窟。我來池上傾酒罇。半酣書破青煙痕。參差翠縷擺不落。筆頭驚怪黏秋雲。我聞吳中項容水墨有高價。一作溶溶水。墨有高價。邀得將來倚松下。鋪卻雙繪直道難。掉首空歸不成畫。

孟東野讀張碧集詩云。天寶太白沒。六義已銷歇。大哉國風本。喪而王澤竭。先生今復生。斯文信難缺。下筆證興亡。陳辭備風骨。高秋數奏琴。澄潭一輪月。誰作採詩官。一作教。之不揮發。

碧字太碧。貞元中人。自序其詩云。碧常讀李長吉集。謂春拆紅翠。霹開塾戶。其奇峭者不可及也。及覽李太白詞。天與俱高。青且無際。鷗觸巨海。瀾濤怒翻。則觀長吉之篇。若陟嵩之巔。視諸阜者耶。余嘗銳志在勇心魄。恨不得攤文陣以交鋒。覩拔戟挾鞞而已。

# 唐詩紀事卷第四十六

劉言史

劉猛

李餘

李涉

劉昭禹

孫昌胤

嚴休復

朱慶餘

劉軻

獨孤鉉

張燦

楊虞卿

楊汝士

張志和

劉言史

竹裏梅花相並枝。梅花正發竹枝垂。風吹總向竹枝上。直似王家雪下時。  
春過趙墟有作云。下馬邯鄲陌頭歇。寂寥崩隧臨車轍。古柏重生枝亦乾。餘潦見風幽燄滅。白蒿微發紫  
權新。行人感此復悲春。

初下東周贈孟郊云。鶴老身更印。龜死殼亦靈。正性非外沿。終始全本情。童子不戲塵。積書就巖扃。身著  
木葉衣。養鹿兼犂耕。偶隨下山雲。荏苒失故程。漸入機險中。危思難太行。十髮九縷絲。悠然東周城。言詞  
野麋態。出口多累形。因依漢元寮。未似羈細輕。冷竈助新熟。靜砧與寒聲。斷蓬在門欄。豈當桃李榮。寄食  
若蠹蟲。侵損利微生。固非拙爲強。懦劣外療并。素堅冰蘖心。潔持保堅貞。脩文返正風。刊字齊古經。慙將  
衰末分。高樓喧世名。

過春秋峽云。峭壁蒼蒼苔色新。無風晴景自勝春。不知何處幽崖裏。臘月開花似北人。  
長門怨云。獨坐鑪邊結夜愁。暫時恩去亦難收。手持金筯垂紅淚。亂撥寒灰不舉頭。

樂府新詞云。花顏鬢髮一何偏。綠槐香陌欲朝天。仍嫌衆裏嬌行疾。傍鏡深藏白玉鞭。噴沫團香小桂條。玉鞭兼賜霍嫵姚。弄影便從天禁出。碧蹄聲碎五門橋。

廣州王園寺伏日卽事寄北中親友云。南越逢初伏。東林度一朝。曲池煎畏景。高閣絕微颿。竹簟移先灑。蒲葵破復搖。地偏毛瘴近。山毒火威饒。裏汗絺如濯。親牀枕並燒。墮枝傷翠羽。萎葉惜紅蕉。且困流金熾。難成獨酌謠。望霖窺潤礎。思吹候鳴條。旅恨生烏澗。鄉心繫洛橋。誰憐在炎客。一夕壯容銷。

言史送婆羅門歸本國詩云。刹利王孫字迦攝。竹錐橫寫吒羅葉。遙知漢地未有經。手牽白馬遶天行。龜茲磧西胡雪黑。大師凍死來不得。地盡年深始到船。海裏更行十三國。行多耳斷金環落。冉冉悠悠不停脚。馬死經留卻去時。往來應盡一生成。出漠獨行人絕處。磧西天漏雨絲絲。

瀟湘遊云。夷女采山蕉。緝紗浸江水。野花滿髻妝花新。閒歌暖酒深峽裏。暖酒知從何處生。當時泣舜腸。斷聲翠華寂寞嬋娟沒。野篠空餘紅淚情。青煙冥冥覆杉桂。崖壁凌天風雨細。昔人幽恨此地遺。綠芳紅豔含怨姿。清猿未盡鼯鼠切。淚水流到湘妃祠。北人莫作瀟湘遊。九嶷雲入蒼梧愁。

放螢怨云。放螢去。不須留。聚時年少今白頭。架中科斗萬餘卷。一字重回重照見。青雲杳渺不可親。開囊欲放增餘怨。且逍遙。還酩酊。仲舒漫不窺園井。那將寂寞老病身。更就微蟲借光影。欲放時。淚沾裳。衝籬落千點光。

觀繩伎云。秦陵遺樂何最珍。綵繩冉冉天仙人。廣場寒食風日好。百夫伐鼓錦臂新。銀畫青綃抹雲髮。高處綺羅香更切。重肩接立三四層。箸屐背行仍應節。兩邊圖劍漸相迎。側身交步何輕盈。閃然欲落卻收

得萬人肉上寒毛生。危機險勢無不有。倒掛纖腰學垂柳。下來一一笑容芙蓉姿。粉薄鈿稀態轉奇。坐中

還有沾巾者。曾見先皇初教時。

路府李相公席上作

買花謠云。杜陵村人不田穡。入谷經谿復緣壁。每至南山草木春。卽向侯家取金碧。幽豔凝華春景曙。林夫移得將何處。蝶惜芳叢送下山。尋斷孤香始回去。豪少居連鳩鵲東。千金使買一株紅。院多花少栽未得。零落綠娥纖指中。咸陽親戚長安里。無限將金買花子。澆紅溼綠千萬家。青絲玉轡聲啞啞。

王中丞宅夜觀舞胡騰云。石國胡兒人見少。蹲舞樽前急如鳥。織成蕃帽虛頂尖。細氎胡衫雙袖小。手中拋下蒲萄盞。西顧忽思鄉路遠。跳身轉轂寶帶鳴。弄腳繽紛錦靴軟。四座無言皆瞪目。橫笛琵琶徧頭促。亂騰新毯雪朱毛。傍拂輕花下紅燭。酒闌舞罷絲管絕。木槿花西見殘月。

王中丞武俊也

言史與孟東野友善。詩中有貝州召郊之作。又有金陵瀟湘之遊。廣州贈北中親友詩。蓋言史平生所經歷處。東野哭言史詩云。精異劉言史。詩腸傾珠珂。取此爲拋擲。飛過東溟波。可惜大國謠。颺爲四夷歌。常於衆中會。顏色兩切磋。今日果成死。葬襄之洛河。洛岸遠相弔。灑淚雙滂沱。

皮日休劉棗強碑文云。歌詩之風。蕩來久矣。大抵喪於南朝。壞於陳叔寶。然今之業是者。苟不能求古於建安。卽江左矣。苟不能求麗於江左。卽南朝矣。或過爲豔傷麗病者。南朝之罪也。吾唐來有是業者。言出天地外。思入鬼神表。讀之則神馳八極。測之則心懷四溟。磊磊落落。真非世閒語者。有李太白。百歲有是業者。雕金篆玉。牢奇籠怪。百鍛爲字。千鍛成句。雖不追躡太白。亦後來之佳作也。其與李賀同時有劉棗強焉。先生姓劉氏。名言史。不詳其鄉里。所有歌詩千首。其美麗恢贍。自賀外世莫能比。王武俊之節制鎮

冀也。先生造之。武俊雄健頗詞藝。一見先生。遂加異敬。將署之賓位。先生辭免。武俊善騎射。載先生以貳乘。逞其藝於野。武俊先騎驚雙鴨。起於蒲稗閒。武俊控弦不再發。雙鴨連斃於地。武俊歡甚。命先生曰。某之伎如是。先生之詞如是。可謂文武之會矣。何不一言以讚邪。先生由是馬上草射鴨歌。以示武俊。議者以爲禰正平鸚鵡賦之類也。武俊益重先生。由是奏請官先生。詔授棗強令。先生辭疾不就。世重之曰。劉棗強亦如范萊蕪之類焉。故相國隴西公夷簡之節度漢南也。少與先生遊。且思相見。命列將以襄之。髹器千事賂武俊。以請先生。武俊許之。先生由是爲漢南相府賓冠。隴西公日與爲飲宴。具獻酬之儀。歌詩大播於當時。爲隴西公從事。或曰。以某下走之才。誠不足汗辱重地。劉棗強至。衆以公必賓劉於幕吏之上。何抑之如是。公曰。愚非惜幕閒一足之地。不容劉也。然視其狀。有不足稱者。諸公視某與劉分。豈有閒然哉。反爲之惜其壽爾。後不得已。問先生所欲爲。先生曰。司功掾甚閒。或可承闕。相國由是掾之。雖居官曹。宴見與從事儀等。後從事又曰。劉棗強縱不容在賓署。承乏於掾曹。拙矣。奚不疏整其秩。相國不得已而表奏焉。詔下之日。先生不恙而卒。相國哀之。慟曰。果然止掾曹。然吾愛客。葬之有加等。墳去襄陽郭五里。曰柳子關。後先生數十歲。日休始以鄙文稱於襄陽。襄陽邑人劉永。高士也。嘗述先生之道業。嘗咏先生之歌詩。且嘆曰。襄之人。只知有浩然墓。不知有先生墓。恐百歲之後。埋滅而不聞。與荆棘凡骨溷。吾子之文。吾當刊焉。日休幸存。旣撫實錄之何愧。嗚呼。先生之官。卑不稱其德。宜加私諡。然棗強之號。世已美矣。故不加焉。是爲劉棗強碑。

劉猛



元微之樂府古題序云。詩訖於周。離騷訖於楚。是後詩之流爲二十四名。賦頌銘贊文誄箴詩行咏吟題。怨歎章篇操引謠謳歌曲辭調。皆詩人六義之餘。而作者之旨。由操而下八名。皆起於郊祭軍賓吉凶。若樂之際。在審聲以度詞。審調以節唱。句度短長之數。聲律平上之差。莫不由之準度。而又區別其在琴瑟者爲操引。採民疇者爲謳謠。備曲度者總得謂之歌。曲詞調。斯皆由樂以定詞。非選詞以配樂也。由詩而下九名。皆屬事而作。雖題號不同。而悉謂之爲詩可也。後之審樂者。往往採取其詞。度爲歌曲。蓋選詞以配樂。非由樂以定詞也。而纂撰者。由詩而下十七名。盡編爲樂府等題。除鏡吹橫吹郊祀清商等詞。在樂志者。其餘木蘭仲卿四愁七哀之輩。亦未必盡播於管絃明矣。後之文人。達樂者少。不如是配列。但遇興紀題。往往兼以句讀短長爲歌詩之異。劉補闕云。樂府肇於漢魏。按仲尼學文王操。伯牙作水仙操。齊牧犢作雉朝飛。魏女作思歸引。則不於漢魏而後始。亦以明矣。況自風雅至於樂流。莫非諷興當時之事。以貽後世之人。沿襲古題。唱和重複。於文或有短長。於義咸爲贅臆。尙不如寓意古題。刺美見事。猶有詩人引古以諷之義焉。曹劉沈鮑之徒。時得如此。亦復稀少。近代惟詩人杜甫悲陳陶。哀江頭。兵車麗人等。凡所歌行。率皆卽事名篇。無所倚傍。余少時與友人白樂天李公垂輩。謂是爲當。遂不復擬賦題。昨南梁州見進士劉猛李餘各賦古樂府詩數十首。中一二章。咸有新意。予因選而和之。其有雖用古題。全無古意者。若出門行。不言離別。將進酒。特書列女之類是也。其或頗同古義。全創新詞。則田家止述軍輸。捉捕請先。螻蟻之類是也。劉李二子。方將極意於斯文。因爲粗明古今歌詩同異之旨焉。

月生十五前。日望光彩圓。月滿十五後。日畏光彩瘦。不見夜光色。一罇成暗酒。匣中苔背銅。光短不照空。